

## TITUQ Chyáng Hun Kat é Laiká (Titus)

<sup>1</sup> Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haû ahtum abyuq é asak lé chôm myit myoqbyu é yanmai, Garai Gasang hkyin yu to bâng é lumjínq hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê. <sup>2</sup> Haû ahtum abyuq é asak hkyô lé, mhaú a sê é Garai Gasang gi, ahkyínq nghu é lháng a joq shi mai danggidiq byi to mù, Yhang masat tô é ahkyínq yam-yoq má sheq mungdang hko kyô é dông lhoq htoq shit lui, <sup>3</sup> nga-nhûng é hkyi yù Sù, Garai Gasang hkunmó hkyô tô é eq rajung za, haû mungdang hko é hkyô lé ngá é loq má ap byi bê nghut ri.

<sup>4</sup> Nga-nhúng chôm lumjínq é hkyô dông mai, ngá zo sîng nghut é Tituq lé laiká kâ kat lhê. Îwa Garai Gasang eq nga-nhûng é hkyi yù Sù Hkrisduq Yesuq chyáng mâ é jeju eq nguínqón hkyô gi, náng chyáng ru joq nyî sháng gaq ô.

### *Kreti Zinlóng Má, Tituq Wùn Waq Râ Muzó*

<sup>5</sup> Ngò, nang lé Kreti zinlóng má nyhi hkyô tô é gi, ngò, nang lé pying tô é eq rajung za, ngò a ban zui saí é loqzó pé lé lhoq pán râ matú eq, wà hkangmó má hpúnq suwún ayá dâng to byi râ matú nghut lhê. <sup>6</sup> Haû hpúnq suwún kut râ sù gi, mara hûn râ hkyô a bo é sù; yhangmyi rayuq za wó é sù; yhang zô pé le, agè ashop é eq jìno a gyô é ga, mara hûn râ jowò a joq é lumjínq bang nghut é sù, nghut râ lhê. <sup>7</sup> Hkâsu mù gâ le, hpúnq-up rayuq gi, Garai Gasâng é sùt

zum sũ rayuq dõng nghut lhê mũ, mara hũn rã hkyô a bo é sũ nghut rã lhê; yhang gi, yhumsing myit a cháng; i-myit a lũm tot; ìhpê é jũn a dut; mabyoq jishũm a kut; a sansêng é ngũn hĩng lé a myit ô nau é sũ nghut rã lhê. <sup>8</sup> Yhang gi, byũ bíng lé dat hkulũm sũ; ge é hkyô lé chyitdap sũ; nũm é sũ, dĩngmãn sũ; chyoyũng sũ; yhumsing gũng lé wó hkgang é sũ; <sup>9</sup> mhoq yu to bê hkyô eq rajung za, lumgĩng é mungdang lé gĩng gĩng zũ zĩng nyi é sũ nghut rã lhê. Haũ hkũn sheq, yhang gi, góbang lé tengmãn é mhoqshit hkyô dõng myit wum wó byi é eq, haũ eq shai lhum é bang lé, shut é hkyô wó tũn shit rã nghut lhê.

<sup>10</sup> Hkãsu mù gã le, gumlau kut é bang, dangsõm taĩ é bang eq mhaũ zõ é bang myo myo nyi ri. Ahpyo-kuq hpyit é hpũng bang je riyhang myo akõ. <sup>11</sup> Haũ bãng é nhut shõ lé gi, xaũ pyãm byi rã lhê. Hkãsu mù gã le, yhangmoq gi, a tengmãn é dõng sutzè lé wó yũ shoq ga luĩ, mhoqshit a gĩng é hkyô pé lé mhoqshit mù, rayhum bang bang lé lhoq hpyoq lhoq htãn nyi akõ nghut ri. <sup>12</sup> Kreti byũ mã é myiqhtoi rayuq lháng gi, "Kreti byu pé gi, ayang mhaũ é bang, tãn jung yosõ dusak pé, lagõn é zo myoqnoq bang nghut akõ." ga taĩ wũ ri. <sup>13</sup> Saksé shĩ gi, tẽng ri. Haũ mù luĩ, yhangmoq gi, Yudaq byu pê é myit htoq mhõ-myi dang lé le; tengmãn hkyô lé he-ngik pyãm é bang pyĩng tõ é dang pé lé le, a gyo kõ é za, <sup>14</sup> haũ lumjĩng hkyô mã gĩng tĩng nyi kó sháng gaq, yhangmoq lé htãn htãn tãn mhoqshit byi nyi aq. <sup>15</sup> Sãn-yũng bãng é matũ gi, azĩng zẽ lhunglháng sãn-yũng ri; a sãn-yũng bang eq a lumjĩng bãng é matũ kũm gi, haĩ le a sãn-yũng é chyat nghut nyi ri; hkãsu mù gã le, yhangmoq é myit nhiklhum eq myit sõn sê é hkyô pé gi, gè gè yhang, a sãn-yũng dut byuq bekõ nghut ri. <sup>16</sup> Yhangmoq gi, Garai Gasang lé sê lhê ga kõlhang, yhumsĩng zui saĩ é loq zõ dõng, Yhang lé he-ngik pyãm é bang nghut akõ. Yhangmoq gi, achaq achyut é

bang, jìno a gyô é bang eq, ge é mô joq mijoq eq a htuk é bang nghut akô nghut ri.

## 2

### *Hká Đông Nyi Yap Râ Hkyô*

<sup>1</sup> Nàng kúm gi, tengmán é mhoqshit hkyô eq wuí é đông mhoqshit nyi râ dut lhê. <sup>2</sup> Hpô-mâng pé lé gi, i-myt shirâm sé râ hkyô; hkungga gíng é byù dut râ hkyô; yhumsing gùng lé wó hkàng râ hkyô eq, lumjíng myit gíng râ, chyitdap myit gíng râ, hkam jan hkyô gíng nyi râ hkyô pé lé, mhoqshit byi nyi aq.

<sup>3</sup> Haú eq rajung za, hpô-myhí mâng pé lé gi, hkungga gíng é a-kyang bo nyi râ hkyô; lumù gansâng dang a tái râ hkyô; ìhpê é jùn a dut râ hkyô eq ge é hkyô lé za dat mhoqshit é bang wó dut râ matú mhoqshit byi aq. <sup>4</sup> Haú hkùn, Garai Gasâng é mungdang gi, lumu pyâm é a hui sháng gaq, yhangmoq gi, hpô-myhí zô pé lé, yhumsing yhanglâng eq, yhangzô pé lé chyitdap é, <sup>5</sup> yhumsing gùng lé wó hkàng é, siri bo é, ikun lé dat wùn waq é, ge é myit wó tân shit é, yhumsing é yhanglâng uphkang é đông dat châng é bang dut râ matú, ge mhoqshit é hpô-myhí mâng pé dut râ nghut lhê.

<sup>6</sup> Haú eq rajung za, zorâm wuí lé le, yhumsing gùng lé wó hkàng nyi kó sháng gaq, lhoq pun lhoq kyíng nyi aq. <sup>7</sup> Hkyô hkat hkangmó má, yhangmoq lé nàng yhang ge é muzó alik tân shit nyi aq. <sup>8</sup> Nàng lé lhom htuq htíng é bang gi, nga-nhùng é hkyô má mara a wó hùn kômù hoq hpû nyi kó sháng gaq, nàng mhoqshit é hkyô má, tái pyám râ hkyô a bò shoq, têng é, siri bo é, eq sansêng é dang tái nyi aq.

<sup>9-10</sup> Nga-nhùng é hkyi yù Sû Garai Gasang eq sêng é mhoqshit é hkyô pé hkat hkangmó yúng nyi sháng gaq, hkyô hkat hkangmó má, jun pé lé, yhangmoq é yhumsing

wui pê é a-ô má nyì mù, yhumsîng wui é i-myt ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

<sup>11</sup> Hkâsu mù gâ le, hkungsô wó é myit myoqbyù hkyô ga é, nga-nhûng é kô myhang é Garai Gasang eq hkyi yù Sû, Yesuq Hkrisduq gi, hpungwup shingkang eq htoq shit râ hkyô lé láng nyi é hkûn, <sup>12</sup> tarâ a hkunggâ é myit eq mingkan myit ô nau é hkyô koi pyám luî, shí ipyat má yhumsing gùng lé wó hkâng râ, dingmán râ eq, tarâ hkunggâ é hkyô wó cháng shoq, <sup>13</sup> nga-nhúng lé mhoqshit byi râ matú, Garai Gasâng jeju chyunghuq gi, htoq shit bê nghut mù luî, byù lhunglhâng bang lé hkyi yù hkyô hpóng byi bê nghut ri. <sup>14</sup> Haû Yesuq Hkrisduq gi, agè ashop é hkyô banshoq mai nga-nhúng lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut râ matú wó lhoq sân-yúng yù shoq ga, nga-nhûng é matú Yhânggùng lé ap byî pyám bê nghut ri.

<sup>15</sup> Nang lé ó yuq èq le, a wú shôm pyám kó sháng gaq; nàng gi, ahko ahkáng banshoq eq, yhangmoq lé shí hkyô pé mhoqshit nyî aq; myit wum byî é eq, tân mhoqshit é hkyô lé le kut nyî aq.

### 3

#### *Ge É Muzo Zui Sai Râ Hkyô*

<sup>1</sup> Nàng gi, lumjîng bang lé, zau wuî eq ahko ahkáng wó bâng é a-ô má nyì mù, jîno gyô nyi râ eq, hkâ-nhám le ge é muzó hkangmó zui sai râ lé hen nyi uchyang, <sup>2</sup> ó yuq lé le lù a mù râ; nguingón hkyô hô râ; myit tê byî é hkyô tân shit râ eq; byù banshoq lé nûm é i-myt tân shit nyî kó sháng gaq, lhoq pun lhoq kyîng nyi aq.

<sup>3</sup> Hkâsu mù gâ le, nga-nhúng le, hí hpyang gi, byù ngok pé, jîno a gyô é bang, mhaú zo huî é bang eq, gungsho

ô nau é hkyô eq mingkan ngón hkyô ajung jûng èq jùn kut é hui bang, dut mù luí, agè ashop é eq manon lhûm é hkyô kut nyí mù, rayuq eq rayuq a jú lhûm é dông nyi laí lò bê nghut lhê. <sup>4</sup> Nghut kôlhang, nga-nhûng é hkyi yù Sû Garai Gasâng jeju eq chyitdap myit htoq shit é hkûn, <sup>5</sup> nga-nhúng yhang kut é dingmán é muzó èq a nghut é za, Yhâng é shogyo nhikmyîn é jeju yanmai sheq, Garai Gasang gi, nga-nhúng lé hkyi yù bê nghut ri. <sup>6</sup> Yhang gi, nga-nhûng é hkyi yù Sû Yesuq Hkrisduq é yanmai, nga-nhûng é ahtoq má agùn agó hut hkyó byí é Chyoiyúng Woi-nyí èq nga-nhúng lé chî san chî sêng pyám byi mù, woi-nyí má dum hku é hui nhâng luí, myit sik htaí byí é hkyô dông nga-nhúng lé hkyi yù bê nghut ri. <sup>7</sup> Haû mù luí, Yhâng é jeju mai mara hkyut san byí é hui bê nghut é yanmai, ahtum abyuq é asak lé myit myoqbyu nyi é eq rajung za, nga-nhúng gi, silí wunlí wó hkam yu é bang dut lò râ nghut lhê. <sup>8</sup> Dang shí pé gi, lumgíng é dang nghut lhê mù luí, Garai Gasang lé lumjíng é bang gi, ge é muzó lé myit lòm luí rago zui saí nyi kó sháng gaq, haú hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lhunglhâng bâng é matú ge é eq, akyû bo é hkyô nghut lhê.

<sup>9</sup> Nghut kôlhang, ana apâ ga luí taí htîng lhûm é hkyô lé le; byùxik labaû gôn é hkyô lé le; nyo byoq lhûm é hkyô lé le; jep é tarâ eq séng mù byoq lhûm é hkyô pé lé le koi pyâm nyi aq, hkâsu mù gâ le, haú pé gi, akyû a bo é hkyô eq chûng a ge é hkyô pé nghut ri. <sup>10</sup> Gam hkuí é myit bò sù lé gi, í dâm mhoqshit wú mù, a wó jáng, yhang lé baú tô pyám aq. <sup>11</sup> Haû su kut sù gi, yhang kut é muzó má mara wó to bê nghut mù, yhumsing gùng lé yhumsíng mara hun é sù nghut é lé, nàng sê to lo aq.

*Je Htâng Má Pying É Dang*

<sup>12</sup> Ngò gi, Nikopoli wà má gyoqmyò lhoq lhai râ dông myit hpyit tô é yanmai, Artima lé, a nghut jáng Tuhkiku lé, náng chyáng nhang kat byi râ, jé eq yhang, nàng gi, shikut luî, haû wà shut ngá chyáng lé lô aq. <sup>13</sup> Nàng gi, tarâ sê é sù Zena eq Apolo nhik lé, yhangnhik é hkyowuì má râ é hkyô banshoq, shikut luî garúm kat aq. <sup>14</sup> Nga-nhông é byu pé gi, nyí wuî râ é hkyô lé wó htuq é eq ashi zuî é bang dut kó sháng gaq, ge é muzó lé myit lòm mù zui saî nyì râ hkyô lé mhoq yû râ lhê.

<sup>15</sup> Ngò eq rahá nyi é bang yuq hkangmó gi, nang lé shi-kyâm kat akô. Lumjínng hkyô má ngamoq lé chyitdap é bang lé, bo shi-kyám byi aq.

Garaî é jeju gi, nungmoq eq rahá joq nyì sháng gaq ô!

## Choyiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

### Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates  
eBible.org

---

PDF generated using Haiola and XeLaTeX on 17 Nov 2018 from source files dated 20 Jan 2018

23f9fc55-a8a4-59ef-9513-707ec336b0ee